



N°436
Entrée le 07.03.2024
Chambre des Députés
Déclarée recevable
Président de la Chambre des Députés
(s.) Claude Wiseler
Luxembourg, le 07.03.2024
Chambre des Députés

Claude WISELER
President vun der
Chamber vun den Deputéierten
19, um Krautmaart
L-1728 Lëtzebuerg

Lëtzebuerg, den 07/03/2024

Här President,

Sou wéi den Artikel 80 vun eisem Chambersreglement et virgesäit, bieden ech lech, dës parlamentaresch Fro un d'Ministere fir den Interieur & Bildung, Kanner a Jugend weiderzeleeden.

D'lescht Joer gouf de Gesetzesvorschlag mat der Nummer 7883 an der Chamber ofgestëmmt, mat deem d'CSV sech dofir agesat huet, dass all Kand de selwechten Accès op informatescht Material soll hunn, egal ob et an enger finanziell wuelsituéierter Gemeng leeft oder an enger finanziell manner gutt situéierter Gemeng. Dëse Gesetzesvorschlag gouf awer mat de Stëmme vun der deemoleger Majoritéit ofgeleent.

Duerch déi grouss Ënnerscheeder bei de finanzielle Méiglechkeeten tëschent de Gemenge ginn et effektiv grouss Ongläichheeten. Grad Kanner, déi a Stéit mat engem méi niddregen Akommes wunnen, sinn hei laangfristeg am Nodeel. Si kréien dacks just spéit Accès op informatescht Material a sinn domat vis-à-vis vun hire Klassekomeroden aus besser situéierte Stéit benodeelegt, déi dacks scho fréi Kontakt domat hunn a besser equipéiert sinn an dowéinst och besser domat eens ginn. Dëst gouf virun allem an der Covid-19-Pandemie däitlech siichtbar, wou vill Kanner aus manner gutt situéierte Stéit beim Cours à distance däitlech manner gutt geléiert an herno méi grouss schoulesch Problemer haten.

Am Koalitionsaccord gëtt dës Iddi och ugeschwat. D'Regierung wëll Diskussiounen mat de Gemengeresponsabelen ophuelen, fir iwwert d'Ausstattung mat informateschem Material an de Grondschoulen ze schwätzen. Grad kleng Gemengen mat méi kleng finanzieller Moyenen hu mat enger steigender demografescher Entwécklung an de Käschtchen vun enger moderner informatescher Infrastruktur ze kämpfen. Ongläichheete si beim informatesche Material an de Grondschoule also virprogramméiert.

Ech hat dem Inneminister an der Froestonn vum 27te Februar hei scho verschidde Froen gestallt, krut allerdéngs just wéineg Informatiounen.

An deem Zesammenhang wëilt ech de Ministeren dës Froen stellen:

1. Den Inneminister huet a senger Äntwert op meng mëndlech Fro geäntwert, dass et am Januar éischt Gespréicher mam Secteur gouf, ee méi genaue Planning gouf awer net genannt. Kann de Minister eis soen, ob et weider Gespréicher wäerte ginn a ee sech a priori prinzipiell d'Accord ass, fir op deem Niveau eppes ze maachen?



www.piraten.lu

Oder dréinen sech Gespréicher nach ëmmer ëm eng Prinzipienentscheidung, ob een dëst wëll maachen oder net?

2. Wat fir weider Pläng hunn den Inneministère an den Educationsministère nach, fir d'Ongläichheete betreffend den Zougang zu informatemeschem Léiermaterial ze reduzéieren?
3. Kann de Educationsminister schonn en ongeféieren Zäitpunkt nennen, bis wéini alleguer d'Schoulen am Fundamental kéinten equipéiert sinn? (Wifi-Infrastruktur, Laptop/iPads, etc...)
4. Wat sinn d'Käschten (opgeschlësselt pro Gemeng) fir de Kaf, d'zur Verfügung stellen an den Entretien vun informatemeschem Material an de Schoule vum Fundamental?
5. Wat fir ee Budget kéint d'Gemengen iwwert déi nächst Joren dofir vum Educationsministère zur Verfügung gestallt kréien?

Mat déiwem Respekt,



POLIDORI Ben
Deputéierten





LE GOUVERNEMENT
DU GRAND-DUCHÉ DE LUXEMBOURG
Ministère de l'Éducation nationale,
de l'Enfance et de la Jeunesse

**Gemeinsam Äntwert vum Minister fir Educatioun, Kanner a Jugend, Claude Meisch, a vum
Inneminister, Léon Gloden, op d'parlamentaresch Fro Nr. 436 vum honorabelen Deputéierte Ben
Polidori**

Wéi den honorabelen Deputéierten a senger parlamentarescher Fro erwäant, ass am Koalitiounsaccord 2023-2028 festgehale ginn, datt Gespréicher tëscht de Representantë vun de Gemengen an der Regierung solle gefouert ginn, fir d'Verdeelung vun den Attributiounen a Kompetenzen am Beräich vun de Grondschoulen ze diskutéieren. Ee vun de Sujeten, deen an dësem Kontext wäert abordéiert ginn, ass d'Bereetstellung vun informateschem Material fir d'Grondschoulen. Am Kader vun dëse Gespréicher wäert analyséiert ginn, wéi eng vun den am Koalitiounsaccord genannte Kompetenze vum Staat kéinten iwwerholl ginn a wat dëst gegebenefalls fir all déi bedeelegt Acteure géing bedeuten.

D'Gespréicher tëschent de concernéierten Acteure stinn aktuell nach ganz am Ufank an esou schéngt et ze fréi, fir iwwert eventuell Conclusiounen, déi aus dëse Gespréicher kéinte resultéieren, anzegoen. Soubal tangibel Resultater virleien, wäerten déi concernéiert Chamberskommissiounen informéiert ginn.

Lëtzebuerg, den 9. Abrëll 2024

De Minister fir Educatioun,
Kanner a Jugend

(s.) Claude MEISCH